

摘藻堂四庫全書薈要

集部

欽定四庫全書薈要

集部

武夷新集卷六

七

詳校官助教臣常循



欽定四庫全書薈要卷一萬四千一百六十一

集部

武夷新集卷六

宋 楊億 撰

頌一首

承天節頌

并序

臣聞聖人之生也必契千載之會昌膺三靈之眷命叶
河洛之祕紀握天地之元符厯數有歸周秦所以訢合
謳謠攸屬唐虞所以丕承益景運未融何以鍾於惟睿
嘉祥不集何以顯於乃神故炎帝有姜水之徵軒轅有

樞星之異少昊有流渚之應顓頊有襲月之感河清社
鳴既彰於圖牒日角龍顏復著於儀表然後執璿璣以
齊七政垂衣裳而臨萬方端居穆清之中獨運陶鈞之
上荷天百祿純嘏之錫無窮比德九皇仁壽之期斯會
者也恭惟五代之季實啓聖宋囊括席卷混一區宇三
葉之盛實生哲后聰明文思對越穹壤涵育萬彙功成
而不宰總制九有神行而無方四隅底寧百度大治羣
公卿士望清光而惟勤播紳諸生頌盛德之靡暇巍巍

乎蕩蕩乎無得而名也惟玄冬之良月實初寒之戒候
乃初吉之翼日即載誕之休辰有司率循舊章請建佳
號皇上奉若先志祇膺典禮於斯時也平在朔易神惟
玄冥涼風生廣莫之郊大呂應伶倫之管氣栗烈以彌
爽天沈寥而益高初陽既躋就之者咸愛冰方盛履
之者不競時令順而玉燭調歲功成而寶厯永於是幅
員之內提封之外越裳之國重九譯而來賓北方之疆
款五原而納貢舟車之所不及風教之所未覃莫不梯

險航深浮琛沒羽萬國麋至會禹於塗山諸侯駿奔朝
漢之長樂是日也佳氣葱蔚非烟郁紛微埃不興纖羅
靡動殿枕龍首敞帝居於鈞天庭列虎賁森羽衛於鈞
盾金奏在簾六代之樂畢陳素錦綢杠九旂之旂並建
庭實旅百毳服成羣列於陞戟之前立於宮懸之右叔
孫綿絕備舉九賓之儀后夔簫韶將致百獸之舞既而
羣臣跼蹐以就列一人肅穆以當陽淵默雷聲溫潤玉
色堯階三尺仰之彌高舜目重瞳望之斯畏上公捧觴

而獻壽太師升歌以詠功億萬斯年共祝南山之固隕
越於下載沾玉笋之餘有位悉享於衢樽羣生永躋於
壽域盛禮斯畢景福無疆下臣忝預周行親履文石從
大夫之後陪未央之朝覩鐘鼓玉帛之云喜聲明文物
之盛固知金泥石碱將有云亭之期豈獨緩帶絲囊但
舉開元之舊而已哉若乃賦頌之作臣之職也昔者有
駉泮林皆諸侯之事耳猶復列在詩什被於筦弦如臣
述大君之功德祝聖人之壽考文雖不足於志事乃有

殊於古美片之意雖可獻於君親擊壤之音豈能中於
風雅惶恐稽首謹獻頌云

惟民樹君惟天生聖實天之子惟民司命神靈在躬岐
疑成性載誕之辰生民之慶乃建佳節其惟承天惟天
為大惟帝法焉惟帝合德罔有後先承之伊何終日乾
乾帝謨廣被天瑞薦至乾符坤珍紛綸總萃玉帛駿奔
飫食飲賜外薄四海敢有貳事龜巢於蓮其葉田田蒙
莊大椿春秋八千山聲響答河色漪漣如日之旦億萬

斯年煌煌老人上應南極昭昭辰星垂象於北如松之
茂如栢之直萬壽無疆自天永錫華封之祝屬於帝堯
中和之頌升於漢朝王澤下濟德音孔昭為之聲詩無
愧採樵

記十一首

處州麗水縣廳壁記

麗水古括蒼縣唐大厯末避德宗諱并郡改焉地亘婺
女之區俗蓋東甌之舊提封之廣袤僅十萬井生齒之

富庶幾八千室自錢氏竊據之際頭會箕歛民不堪命
及聖朝混一之後生聚教誨日不暇給縣署湫隘僅庇
風雨偪下已甚陋如之何前此宰邑者皆鞅掌王事沉
迷簿領盤錯游刃之不暇棟宇改作之未遑至道初天
予以古者郎官出宰百里申命廷尉評甄侯旦以六百
石秩來涖是邑侯孔門之達者也吏道詳敏而飾以文
學天資高朗而輔以經術清白以率下明察以照姦獄
訟滋彰必片言以折賦調倥偬皆先時而辦曾未期月

縣政大成天子嘉之凡再降璽書進爵朝大夫摠殿中
六尚之職不改其任恐奪民賢君增秩以留用西漢故
事侯既五月報政休聲著聞終日清談庶務自治從容
暇豫周覽縣齋苦葢不完梁木將壞慨然憤發經之營
之度山取材懸金購匠因農務之隙慕子來之徒運斤
成風揮汗為雨皆曰吾儕小人猶有闔廬以避燥濕寒
暑豈我賢宰君築室而不速成乎曾未浹旬層構云畢
恍若神化煥乎惟新凡樓以藏詔書廳以決政事樓之

南敞重闕可入方軌廳之北闕回廊僅容宴豆通而計之共十有一間麗譙渠渠治象之法在焉堂皇戔戔神明之化出焉侯陟降以之造次於是職修事舉體寧神王使虛室生白高門容車後來之人坐享其利侯之規模信宏遠矣昔者一日必葺春秋稱叔孫之賢百堵皆作詩人著斯干之詠鄙夫不佞假守方州每行春棠郊攝齊偃室目是輪奐飽其風聲爰勒貞珉以志成事異日甄侯棄去下邑揚於王庭此邦之人誰無遺愛即陵

遷邑改斯宇也比靈光而獨存石泐金銷斯文也與峴首以同致後之君子善似續之

處州龍泉縣金沙塔院記

金仙氏之處有自來矣天毒之國實紀於山經竺乾之師嘗聞於柱史西京名將得休屠天祭之人東漢諸王為蒲塞桑門之饌道之行也源遠乎哉三吳奧區控帶閩粵魚鹽所出生齒實繁昔仲雍之翦髮文身參以殊俗劉渢之即山煮海放於末游加以勾踐之好兵民性

獷悍益之東甌之事鬼土風妖訛自像法西來漸被諸

夏此方士庶佞佛尤謹毀形變服競為芘芻之飾傾財

破產爭修浮屠之舍含福畏禍革音遷善水火或蹈微

纒罔懼而怵報應之說堅信向之心姦軌用哀民德歸

厚易所云神道設教者其是之謂乎縉雲西鄙之邑曰

龍泉實歐冶子淬劍之地土田膏腴居人雜錯山谷環

合習俗豪舉版圖所載提封萬井舟楫僅通懸流千仞

縣之南有精舍曰金沙林嶺襟束烟霞虧蔽地形四塞

靡通鳥道石門中豁迥非人境香火不絕鍾唄相聞聿
為道場多歷年所徒衆彌盛堂構益隆求之東隅益有
隙地邑人李文進施財百萬造塔七層貨泉之費已殫
土木之功未畢桑門延通與其徒鴻顯暨大姓李仁祿
共唱其事薄斂於人經斯營斯載樸載斲基扁環回而
固護堂陞崛起以穹崇斬材也必取山木之良礲之以
密石購匠也必擇雲梯之巧賞之以兼金極剗剔之工
加丹雘之飾築室斯廣益百堵之有餘為臺甚高非三

休而能詣鳥鼠攸去燕雀是依名輦軒而欲飛巨鼇兀
以方拊由余謂之使鬼士茁疑其勝人殆歲星之周天
始祇園之訖役凡堂以陳賓主之次室以備宴息之所
高門洞啓回廊翼舒庖厨載嚴井樹攸設舉其成數凡
四十間湧塔屹於中庭反宇聳於天半泛朝日以增麗
蒙夕靄而如失作鎮茲壤垂厥方來且以岳陽王感應
舍利李長史華嚴合論匱而藏之目之曰華嚴寶塔舉
其一而稱焉亦取夫百寶莊嚴之義也夫誠不果者物

不應志不篤者事不集故霜隕燕地風擊齊臺誠之謂也精衛填海愚公移山志之謂也若通師者奮空拳創曾構秉心固必異石席之卷轉致功微漸同水索之鑽鋸於是名豪居士捐千金而不疑織婦販夫拔一毛而無惜聚財致用積日累勞物力告窮形勢總萃非夫挺雞鳴不已之操用蚍蜉時術之功磨涅靡渝顛沛於是固將九年治水厥功弗成一簣為山中道而止迹其所自夫豈偶然予乃知夫西方之言有益於化大雄之教

不虛其傳矧於海隅崇尚尤篤以通師之善誘以邑人之悅隨譬諸靈臺既克成於不日將比棠樹永見愛於斯民豈只軒丘之獨神孔堂之不壞而已汝南周啓明者郡之造秀占數是邦致書於予懇請為記聊叙始末以附諸地志焉

處州郡齋凝霜閣記

夫談仁義者必就閒宴避炎酷者必登高明故魯史述其三宮詩人詠夫百堵中堂湫隘婦姑由是敎蹊大夏

穹崇燕雀以之相賀若乃叔孫之葺牆屋陸抗之治廬
舍去如始至後無以加賢者用心豈徒然耳茲郡唐季
之亂王澤弗流大姓名豪竊據其地腹背受敵兵戈日
尋假息朝晡遷保巖險迄今郡署冠西山之顛高出千
岑俯窺萬井微道迂曲何翅乎七盤峯頂坦夷不過乎
數畝廐庫之外參以吏舍向之平田占其半矣堂廡之
制因而偏下亭榭之設率以乘危每溫風敎興畏景流
爍如臨熾炭若游沸鼎冰壺屢挹內熱靡蠲羽扇迭揮

流汗相屬俄頃之際焦爛可期蓋由夫改築之初面勢

素定因重崗之迴抱且四垂之斗絕堂塗迫窄不開南

榮棟宇膠轕無有北戶故鬱蒸之戒候必薰灼之是憂

自國朝已來領郡者僅以十數率因簿領未暇經營及

余之蒞是邦也承數賢之餘庶務修舉曹無巧詆之吏

下無失職之民清心處之期月而治道離曠熱殆將委

頓因創飛閣於東北隅運甓壘土以成基斬木陶瓦而

備用僅及旬浹層構巋然軒牕洞開景象輻湊峯巒揜

映雜火雲之差。我溝塍糾紛漲時雨。以澎湃閭閻森以
相錯。竹樹翠而成帷。百里雖迥不隱於秋毫。萬象實繁
如在於指掌。固可胸中蕩於鄙恡。眸子極於沈寥。披襟
以當雄風。岸幘以度永晝。憑高望遠。式動能賦之心。置
酒娛賓。便為逃暑之飲。夫如是。乃體寧慮澹。心和氣平。
莊室彌虛。神明所以來舍。孔堂不壞。絲竹期乎有聞。豈
但逶迤退食之餘。從容案吏而已。閣既成。命之曰凝霜。
將使來者無執熱之煩。登者有解慍之適。亦猶抱朴子

所謂玄冰丸飛雪散用以卻暑兼取夫相勝之義云

南康軍建昌縣義居洪氏雷塘書院記

三代已還鄉黨皆有庠塾兩漢而下公卿多自教授及五胡猾夏一馬渡江揚粵之區衣冠舉集士風文物雄視中原蓋劍客奇材昔稱荆楚之士寬柔以教今見南方之強用是出相不下於山東明經僅多於鄆魯街談俚語必及詩書總角弁髦即遊學校由學而禮讓著由讓而孝義敦班白相推於道途耆艾靡遊於市井耕者

異畔賈不求豐亦猶夫洙泗之濱斷斷如也南康洪氏
傑出其間以耕鑿之勤厚致資產以孝悌之德大庇族
人奕世聚居期功踰於百口至行內激風聲樹於一方
州閭之內人無間言閨門之中衣無常主漸漬玄澤陶
甄至和彬彬然有萬石孝謹之風熙熙然躋華胥仁壽
之域且於所居之側崇飾學舍一日必葺賓至如歸厨
廩益豐弦誦不輟褰衣博帶豈減闕里之徒竹簡韋編
將敵祕書之副子弟之秀者咸肄業於茲田蘇與遊曾

哲同志列第侔於稷下鼓篋比於虞庠韋賢之一經相
傳劉氏之七葉俱盛豈只游談之矜式羈旅之疇依設
驛馬於四郊來遠客於千里而已至道中天子遣美俗
使者按行郡國且以御書百軸下賜其家家老文撫以
隱居求志肥遯不仕即遣其弟文舉入謝天闕特賜清
閒之宴召對赤墀之下勞問數四歎息久之解褐授官
以示光寵天子又自署一幅曰義居人以賜之閱閔增
氣閭巷改觀雖古之里稱通德族號高陽家有賜書門

標六闕者曾未足擬也矧處士君耕於巖石名動京師
身在江湖心懸象魏每歲遣其子弟陳土貢於宰旅上
必蕃錫以答其意野芹之獻蓋以薦誠園葵之心特蒙
委照自渥恩下及精廬彌肅寶玉在笥芝蘭盈庭去年
處士之兄子待用舉進士得乙科同時儕流登是選者
以十數初覆一簣蓋由椎輪後來之人貫魚而進以錫
羨流光之慶加討論博習之資珪組相輝將珥貂於七
葉生徒益盛必著錄者萬人然後臻夫極也學館之南

有雷塘焉因以為名且志其地先是尋陽陳氏有東佳
學堂豫章胡氏有華林書院皆聚墳索以延俊髦咸有
名流為之紀述講道論義況力敵以勢均好事樂賢復
爭馳而並驚宜乎與二家者鼎峙於江東矣今年助教
來齋處士書謁予願志其事且嘉其服道淳固樹善深
篤謹守家法勤接士類高門積德已容駟馬之車上帝
藏書更同羣玉之府景慕不足牢讓非宜僂俛成文聊
以塞請而已

致政李殿丞豫章東湖所居涵虛閣記

涵虛閣者致政李公考槃之所也李公挺生民之秀負
王佐之才決科廣庭文雅第一從政劇邑吏人不欺以
太夫人在喜懼之年有羸老之疾拜書北闕求養南陔
天子嘉之恩禮尤異既蘭臺之進秩仍水衡而分俸用
致官政歸侍庭闈始卜居歷陽載離寒暑會公之令子
令西臺御史以尚書郎通守洪井叔孫必葺豈復懷安
元方將車因以東上今年御史秩滿歸闕公且致書於

予曰寥東西南北之人也前年來江西登臨山水覽觀
風物戀戀而不能去且欲占數為是邦之民買田一壥
築室百堵編名戶版輸稅公上陶陶然與漢陰丈人携
手於羲皇之世矣茲郡之勝實惟東湖今之所居介於
湖上却視闌闌前瞻渺渺棟宇繆輻而世喧自分魚鳥
聲聒而物態咸見澄波萬頃韜映雲天崇朝八達絡繹
冠蓋此亦古人大隱之跡不出市朝儒者一畝之宮僅
庇風雨者也且念嘉賓至止必宴豆以伸歡諸生來思

乃函丈而請益捧觴拜慶既以奉北堂之縱心岸幘燕
居亦欲倚南窓而寄傲裁擇爽塏累土增崇俯瞰漣漪
面勢素定市山木以櫟斲命梓匠以經營作為堂皇成
之不日形勝盡萃軒檐若飛春之晨雜芳被隄綠波如
染可以臨清流而賦詩夏之晝涼颼拂衽炎雲成峯可
以登高明而逃暑潦收水清羣木搖落可以詠秋氣於
楚詞歲暮天寒密雪飛舞可以歌南山於周雅固足以
鑑心猿而習靜狎海鷗以忘機宴坐觀空入毗耶之不

二谷神反聽味玄元之五千豈徒晨昏調膳之餘雍容
肆體而已東臺舍人董公昔典是邦或退食之餘必命
駕以至留連觴酌從容笑語憑軒曠望目送飛鴻秉燭
徘徊門留駟馬賞心不足好樂無荒實由斯閣之成能
迴長者之轍若夫天宇岑寂湖光皎鑑俯見雲鳥毫末
靡遜其形旁連邑居囂譁不接於耳遊氛宿霧寥廓洞
開遠水長空混茫為一髣髴其梗概目之曰涵虛優哉
游哉聊以卒歲願志其事式為美談予與公有同郡之

情有忘年之契親比耆德欽聞緒言是用景行高山講
求方策若虛白之室莊周得之逍遙通德之門司農推
之鴻博集文選於南荆者層樓尚在草太玄於西蜀者
高臺未傾吳興有韻海之堂秣陵有烏衣之舍載之圖
牒芬若椒蘭今李公地望門風仙姿道骨清白義方之
訓予文儒經術之傳家疏廣之揮金老萊之曳綵蘊是
全德無忝先民而在家必聞作事可法歸然茲宇揭於
通都聲實飛騰游居企慕締構得地風烈在人予固知

夫異日與滕閣孺亭鼎峙於鍾陵為不朽矣承命之辱
叙事靡周聊述所聞以祇來請云耳

連州開元寺重脩三門行廊記

夫南荆之分上當翼軫實領於天官長沙之壤析為連
山具載乎地志桂水千里詩什之所徵乳穴十九方物
之攸產民俗忠厚土田膏沃力穡務本不訾窳以媮生
復性遷善多齋戒以奉佛憂深思遠雅有離騷之風徵
福乞靈靡事淫昏之鬼殆一變而至道何必齊魯豈九

州之異宜見殊楚越者已開元寺者茲郡之招提也俯
臨康莊介於闌闌崇墉嶽峙飛觀神行像素載嚴焚修
彌絜允為精舍居然化城而芟蕩之徒頗有開士香積
之供多出都人梵唄相續於六時依止克安於四衆然
締構之始爰自唐朝厥初窮樸斲之工殫匠石之巧百
堵皆作殆土木之勝人大夏聿成幾燕雀之相賀歲祀
寢遠繕完或虧高門洞呀瓦斯解而屋漏回廊矢棘棟
既折而榱崩河南丘君穎適典是邦布政多暇行春之

隙稅駕于茲顧慕徘徊精誠奮發乃欲易其隤陁高其
閑閤遂得常住之餘訾且慕邑人之獻力經始勿亟庶
民予來出言有章同聲響應繇是備物而致用即舊以
謀新梓人揮蠅翼而無傷役夫如魚鱗之雜集脩檐重
負狀名輦之斯飛淨土增嚴見黃金之側布疋徒未幾
厥功告成前敞三扉下臨萬井東西二廡爰畢於墜塗
崇期八達亦甃以甃甃丹楣銅沓可以方軌並入砥平
繩界可以結駟而馳足以攝族姓之歸依標郡城之壯

麗又何必淨名丈室紛委四華帝釋天宮莊嚴七寶而
已烏臺御史邵君曄實生樂國夙奉仁祠由委質策名
乃離邦去里致恭於桑梓邁德於親隣而清識造微懿
文稽古故茲郡牧宰彼方人凡作事謀始必命介諮諏
底績僞功即置郵赴告予與君接武臺閣交驩旦暮且
述紺園之役見徵翠琰之文垂示將來用圖不朽靡及
勞讓聊此直書云耳

故河中府開元寺壇長賜紫僧重宣塔記

師姓趙氏中條虞鄉人也由河沙劫來殖衆德本未斷
後有復生人中積習聞薰童幼穎異宿機冥契割愛捨
家十五禮文徹師為沙彌二十一依澄暉師受具戒亦
既持乞士鉢披水田衣深念善財徧叅知識尤慕慶喜
具足多聞振錫遊方剎心求法其始以比丘持律纔許
五年諸佛度生是為初教且從本師受四分律又以如
來出世益一事之因緣衆生無邊有萬殊之根器爰自
降神兜率示滅鶴林宣說十二部經震動大千世界其

間具偏圓半滿之義開權實損漸之門雖文字性空語
言相離然而標指見月乃理事之兼通得魚忘筌始覺
照之都泯師是以從歸一和尚傳無量壽經依行滿法
師闡因明論盡達宗旨咸有師承終身受持為人演說
蓋四句之偈福利居多一音所宣悟解斯衆又復專持
首楞祕密之呪徧閱毗盧方廣之文八郡歸依天宮辦
香積之供四衆圍繞空界雨曼殊之花凡讀大藏經一
萬餘通誦佛頂真言三十萬過鎬京蒲坂實有化緣前

後登甘露法壇宣尸羅淨戒得度者僅千餘人破塵出
經多蒙利益傳燈分照豈有窮盡馬祖門下皆一時之
利根龍華會中實當來之眷屬人天主伴夫豈偶然秋
官貳卿上谷寇公早在先朝參預大政重師之行薦於
帝庭詔賜紫方袍以旌其德處六和之衆而天子知名
介三法之微而王臣外護非蘊空漏盡神足智圓為彼
岸之舟航作釋天之日月者疇能致是哉師以咸平四
年四月庚戌示身有疾殆至彌留盡召其徒授之治命

薪盡火滅神往形留相好儼然道俗傾慕報齡七十有
九僧臘五十有八甲子奉金身閣維於南郭之外得舍
利三十餘粒以其年某月某日遷靈骨於其原建浮圖
焉上足弟子賜紫令操入室推賢傳衣善繼思欲奉揚
遺懿昭示將來戾止上都以塔記為請予素服能仁之
教尤欽開士之風且與上谷公道契無生心專趣大樂
天綺語固願贊於佛乘執戟蟲文豈能宣於真諦聊撫
梗概幸免枝游云耳

婺州開元寺新建大藏經樓記

昔如來登菩提坐為天人師萬德莊嚴十號具足大千世界以願力而攝受十二部經自悲心而流出所以宣暢了義提拯羣迷開方便門示真實相有條不紊譬以綫而貫花得象忘言如標指之見月自鶴林示滅大教方行而龍宮祕藏所傳無幾爰暨像法之運乃流震旦之區大士繼生廣譯五天之語精廬錯峙竝緘三藏之文於是大雄之法音雷震于茲土矣勾吳之域介於海

隅東陽之墟上直嫫女蒙太伯至德之化俗敦廉讓之
風漸初平好道之餘人稟清真之氣有恥且格見善乃
遷邑居相望悉奉竺乾之教弦誦之隙必閱貝多之言
繇是棄塵勞而為芟芻者實繁有徒闢淨土而崇塔廟
者比比而是開元寺者茲郡之大招提也前臨九達旁
接萬井金碧絢彩上擬天宮鐘梵交音居然福地土水
壯且麗矣歲祀寢以遠矣龍象六和之衆禪律交修香
燈四事之供檀施總萃而琅函寶偈有所缺然乃有本

寺僧文靖與本州都知兵馬使曹維旭同發志誠共營
勝利爰以淳化中相率詣闕擊登聞鼓求方借版摹印
具文奏牘上聞帝俞其請逮至道初維旭等始共輦置
楮墨之直聿來京都詔免闕市之征授以要券繕造既
畢護持而歸特給上計之迴舟俾達金華之本郡維旭
等又相與刻軸以文木織條以色絲香芸染籤丹漆塗
匣崇飾既以脩矣誓願既已圓矣而經臺舊基圯毀滋
久軒廡摧撓漫繪踏駁維旭等遂請於郡閭躬詣屬城

徧慕有情共成衆善鳩工度費卽舊謀新建重樓開法
藏其上級置盧舍那文殊普賢及十六大阿羅漢之像
中級設虎座作八神王箕踞捧持其下象七金山法四
大海寶地平布祥雲周繞締構彫鏤殫匠石之精能像
設焚修見天龍之護衛固使黑白之衆有所歸依利鈍
之根因而啓發皮紙骨筆學道者靡涉於艱辛寶藏金
言開卷者並諧於悟入廣大利益豈勝言哉維旭又嘗
於雍熙中慕衆緣累覽為浮圖凡七級直經樓之南十

數步訖役之日白光燭天晴空沈寥久之始滅行路瞻
覩道俗嗟歎斯亦樹善之冥感殖福之昭報也予咸平
中罷守縉雲道出茲郡維旭者捧持事狀拜於道周求
得片文以刻貞石會予入掌書命不遑官次而勤請彌
篤踐言是冀予固從事於空宗者也隨喜稱讚豈有怍
焉削簡含毫茲用無愧云耳昔景德二年歲次乙巳十
二月朔日記

潞州新勅賜承天禪院記

景德元年冬天子巡狩澶淵駐蹕河上始議和戎之利
慎柬使乎之才乃詔西京左藏庫使獎州刺史隴西李
公繼昌奉將信幣克成盟好復命行在不逾浹旬奏事
宸居沃心稱旨時黃屋值流虹之慶帷宮舉稱觴之典
執玉萬國塗山無後至之刑舞羽兩階靈臺有偃兵之
議純嘏之錫上帝是賚富壽之祝率土攸同公因頓首
上言以上黨舊邦卜居累世有環堵之室乃先人之廬
而自叅表著於內朝占名數於京邑喬木猶在高臺未

傾願為仁祠以施開士增飾輪奐肅奉焚修庶以衆善
之因仰助無疆之算上覽奏嘉歎即命俞之中錫璽書
旌以懿號曰承天禪院從其志也夫箕裘善繼前典攸
稱桑梓致恭先民所重雖知樂之至不忘所生而似續
之賢由於肯構矧壺闕之壤上應昂畢羊頭之阨北當
燕趙國俗尚武人氣多豪控山東列郡之衝乃天下勁
兵之處悲歌慷慨寢以成風土厚水深居之不疾而公
之先正茲焉挺生蘊翁歸文武之才茂荀息忠貞之力

始仕周室逮於皇朝功濟生民道合明主厯計相之劇
任處宣猷之上列乃至正位機密允輔大政當太祖皇
帝夙興夜寐經營四方料敵伐謀指蹤千里前席借飭
允集大勲持建節牙出臨巨屏功成身退高朗令終惟
公經德體仁象賢濟美職在清禁爵為通侯門戟鼎銘
昭閎閱之盛朱轡佩玉顯車服之貴誓師邊徼威肅巴
賓作牧藩垣政成海岱單介使虜通玉帛之驩三接承
顏居心膺之任萬乘親倚羣公傾慕蓋所謂人倫之佳

士帝右之信臣者也先是公之載誕亦在舊居指樹尚
存藏鏤可驗嘗蒸奉祠履霜露而長懷并白思歸顧粉
榆而永感然而高扉納駟奕葉珥貂塋不遷親隣素
擇褻成徙籍益出主恩楊僕移關敢惟特議且深信內
典勤修白業念旻天之罔極報德無階緊覺海之大雄
歸心有素恭承明詔肇開淨土棟宇之制侔七寶之莊
嚴苾芻之徒極四事之供養匠石殫巧天龍薦祥金碧
炫彩於晨曦鍾梵交音於空界問安之寢聿為道場學

禮之庭更張法席足以滋殖德本發揮善利香象負重
廣集彌天之流水鳥談空更同極樂之國福祉之盛豈
可量哉昔者南朝諸公多施宅而為寺西域長者競捨
財以供僧簡策相傳風流未遠貝多所記報應非虛訂
公之為斯一致耳曩者太尉先王居顯位受厚祿寵錫
蕃庶私帑充牣奉身甚約事佛尤謹生平飯僧七十萬
造千佛像修紺殿以嚴寶刹飾琅函以祕金文又以方
牘摹印金剛上生等經施於四衆山門禪苑多所繕完

什器道具率用營置深達實相不滯根塵盡此報身當
得解脫君子謂李公詒謀錫羨源深流長福履所綏凡
情叵測何只積善餘慶啓八世之莫京定須當來下生
首三會而受記父作予述不其躋歟予職在右曹心師
西竺辱公之請至於再三僊俛揮毫以謹歲月而已時
景德二年歲次乙巳四月八日記

建安郡齋三亭記

夫好尚非一仁智有山水之殊居處異宜高廣致陰陽

之沴故書稱肯構詩詠斯干列國之禮賢渠渠夏屋先
聖之談道申申燕居矧乃專城按部之崇觀風布政之
隙經始不日無土木勝人之譏退食自公有宴飲合歡
之所斯固君子之作事良牧之用心者已建安大邦保
界閩粵綿地八百里生齒十萬室賦興維錯民俗豪舉
國朝肇建戎閫必作鎮以壯王乃眷縣道亦精擇於健
令即良二千石之寄從可知矣渤海高君由曲臺綿蕞
之任領茲郡山澤之征就降璽書委之符竹而君正身

以律下清心而治煩釋其磐牙陳之藝極訟既息矣徽
纒棄置於園廡化之行焉弦誦流聞於鄉校豪猾屏氣
逋亡悉歸頤指而諸曹承風坐嘯而一郡無事君且念
居室先後之訓著於禮經臺榭高明之說存諸月令蓬
壺溟渤形詩人之歌詠觀閣池沼播名卿之序引於是
周爰公舍眷求遺址方塘白水皎鑒澈明虛榭危檐摧
頽圯毀即命匠石授以楷模曾未旬時汔終力役審曲
面勢䟽為三亭反宇飛甍瞰茲一水俯北岸曰勤公仍

其舊也其西曰旭景其南曰澄鮮皆繚以脩廊狀輦飛
之制巍然層構侔鼇負之雄池之東累土積石為千巖
萬壑之態亭之南築堦設次習六鈞七札之事每棠郊
聽訟有憇芟之勤鈴閣思政乘鞅掌之暇獄既決矣隱
悼伏念以無冤吏且休矣棲遲偃仰而多適君必巾櫛
自便履履以登送目次寥養浩然之氣披襟軒檻當快
哉之風固已遣仲舉之鄙恡生蒙莊之虛白至若輜軒
一介有于役之勞盛府初筵有從事之樂郊勞餞飲之

外爰洽於宴私羽書幕畫之餘率多於暇豫君必散核
維旅履舄交錯裁雕章於寸燭豆泣釜中奏妙曲於繁
絃魚躍波際固已展春秋地主之禮盡賓客杯酒之歡
其餘即詠歎發於如仁尸祝宗乎全德去如始至嘉叔
孫之能賢歸然獨存期靈光而為比經構之旨豈徒然
哉某占數樂郊名叅戶版濫官近署跡繫君門少游下
澤之車空深懷土正平爵里之刺不獲望塵恭佩高風
欽聞新政而况圖繪勝概覩縷尺題金玉其音日月

以冀幸叨史氏之職願紀與人之誦才少思軋亦不敢
辭進牘含毫用謹歲月而已時景德三年歲次丙午八
月一日記

邠州靈應公廟記

奉勅撰

夫有天下者徧祭於百神載祀典者非止於一族故成
周之盛咸秩無文春秋所記並走羣望秦并六國祠官
之領實繁漢繼三代有司之傳彌廣是知出雲見怪不
必主於山川捍患禦災固悉存於尸祝牲玉有等廟貌

斯嚴齋肅吉蠲薦之以馨德聰明正直降之以嘉生然
後百工允釐納民於軌物三時不害躋俗於仁壽茲盛
德之事也非聖人孰能隆之哉咸秦之區上直鷄首山
河四塞幅員千里雍州爽塏秦時神明之隩幽土深厚
公劉王業所基列地百城提封萬井崇墉濬洫制擬通
都比戶連甍俗成樂國有神保順公者斯土之靈祇也
幽贊無方休徵叵測血食制位巧厯不記其年公袞錫
封良史頗逸其事歲月增逝修奉彌勤神光燭壇野雉

皆雖回風翼駕青虬載翔誠既感而必通靈雖久而靡
歇郡或致禱爰昭報而格思民苟不虔乃憑怒而伸儆
繇是愛之若邵伯之樹畏之如共工之臺天或降災克
銷憊伏之咎人斯構厲能弭札瘥之殃百祥存臻一境
是賴蓋社稷均享同喂嘔之宗亢倉歌舞致誠比沅湘
之祠太一神道設教是之謂乎而必葺以來為日斯久
繚垣有復隍之懼崇構幾橈棟之凶守臣上言俞旨適
降經始以度費因時而儻工取大壯之新規賁集靈之

舊址成之不日升聞於天特賜號曰靈應公昭神貺也
且有明命屬於下臣聿徵鄙詞以志休烈恭惟馭神以
祀者邦國之大事為民祈福者天子之深意有虞望秩
璿衡齊政而靡慙姬文懷柔寶龜卜載而彌永祚德儲
祉豈誣也哉謹述謏聞慚於漏略時景德三年月日記

武夷新集卷六

欽定四庫全書薈要卷一萬四千一百六十二

集部

武夷新集卷七

宋 楊億 撰

序

十七首

溫州聶從事雲堂集序

雲堂集者永嘉從事聶君茂元試吏括蒼日所賦詩也
君雍熙三年舉進士策名乙科由一命隨牒茲郡屬仍
歲大稔比戶小康賦輿先期獄訟滋少盤牙悉解郡閤
鮮薄領之勤燿火不驚幕府無書檄之事婉畫勿用善

政已成飄飄然其於遊刃固有餘地矣於是占勝選奇
尋幽覽古名山福地必命駕以遊美景良辰乃登高而
賦精驚八極智周萬象觸類有得少選成章信所謂造
次顛沛必於是者也其或心將化馳意與境會聞簫韶
者不知肉味逃虛空者蔑聞人聲追鴻濛而與遊搏扶
搖而上擊其探賾也若求玄珠於赤水索金簡於丹臺
其得雋也如縱涸魴於西江騁歸鴻於碣石故再歲之
內所賦凡二百篇東甌山水之清麗縉雲謠俗之樸古

佛刹玄祠之標概訟庭官舍之形勝見於題詠之什矣
一郡人物之選一時寮佐之盛林谷高蹈之士吳楚薄
遊之賢備於贈答之作矣名邦風俗之美通人吏隱之
適齊眊富壽之樂居上神明之化形于唱和之篇矣若
乃國風之作騷人之辭風刺之所生憂思之所積猶防
決川泄流蕩而忘返絃急柱促掩抑而不平今夫聶君
之詩恬愉優柔無有怨謗吟咏情性宣導王澤其所謂
越風騷而追二雅若西漢中和樂職之作者乎君素工

于詩及載筆從軍又得茲壤前後左右陟降俯仰皆青山白雲茂林修竹嗜欲之物旦暮在前矧又旁睨石門謝公遊歷之所却瞻東陽隱侯賦詠之地精爽未泯風流尚存宜乎聶君之于詩彌所感發豈二子之風期脗合潛有欣助歟而此都之靈粹閎蓄將有散越歟不然何其得之多也去年予假守是邦今年通理虞曹外郎常公將命賦民鹽於隣郡既飲至且達聶君之命以集為賦而序是求雅意甚勤飾讓非禮聊叙梗概以塞其

請若夫永歌嗟嘆之不足識者開卷而盡見也豈僕倦
談者所能一二乎

送進士陳在中序

昔孔子五十而讀易以至韋編三絕然後知天命之終
始自衛反魯刪詩定書樂正雅頌各得其所六籍既立
百王由是取法焉蓋夫易者世歷三古人更三聖達性
命之際通神明之德探賾索隱鉤深致遠故曰易不可
見即乾坤之道幾乎息矣若乃春秋詩書禮樂猶五行

之更用事而易為之原古者十有五而志于學既耕且
養三年而通一藝三十而五經立也至于學易必俟夫
四五十豈非心志未定不可以參陰陽之變涉獵未博
不可以覩聖哲之奧至有脣腐齒落塊然面墻其或汭
波討源翦焉先覺黜章句異端之說研彖象極深之旨
不俟知命之歲不求一卷之師天人之占鬼神之變消
息盈虛之理吉凶悔吝之徵自明而誠若指諸掌非夫
稟人倫之上智得天下之至精其孰能與於此乎潁川

陳君世家甌閩寢處墳素少好易象洞達其要嘗慷慨
發憤以學者傳授失其宗本去聖逾遠亡羊多岐大懼
夫義文之微言將墜于地乃鋪衍遺意發揮成文作賦
六十四篇篇演一卦之義前年從賦南安郡薄遊上都
扣門造予以賦為贄予一見而甚駭之也深者厲之堅
者鑽之高者跂而望之幽者俯而探之汗漫無際者凌
厲以求之窈冥無狀者罔象以索之隱几彌旬恍然有
得或談于臺閣僚友或語于場屋流輩聞善如響爭取

以觀於是陳君之名一旦籍甚所謂易賦者亦盛行于
時既觀藝澤宮不利攸往蓋聿來下國勦無先容新羈
之足爭據於要津寒谷之苗不沾于暖律非戰之罪也
其勢使然乎退歸舊廬高卧環堵今年予典郡甌越命
駕爰來乘桴浮海冒風濤之險杖策徒步越嶺嶠之阻
將以生平素業伸於已知若予之孤陋迂濶何足以當
之哉陳君其亟隨鄉書便卜西笑有司方選擢寒雋牢
籠英傑以副萬乘虛左側席之意君博綜文史詳練經

術詞彩奮發學植堅深取片玉于崑崗之巔影華纓於
文石之陞可以俯拾未足為難矧乃行有餘力深窮繫
象天子方復三代之制開庠序聚生徒選經明行修之
士列于學官以教胄子如君醇儒當中茲選僕謂君明
聖人之道將有以及于生民揚于王庭宜取顯位一博
士之任豈足為君辱哉勉哉西遊努力加飯

送觀道人歸故山詩序

浮屠依觀師建安吳興人少落髮為桑門棲雲居山結

草茅為廬與猿鳥雜處日中一食凡數年矣鄉人慕之
爭攜糗糧茗薺鹽酪以詣其所或稽首膜拜精意懇倒
迎至其居作佛事以祈福師亦不能却之然心殊不喜
鄉人以師所居風雨之不庇也營棟宇作像設經始弗
亟輪奐惟新師外形骸黜健美行不累俗居無求安崇
臺廣夏非其所樂也精舍既成俾其徒糞除之轉詣窮
僻緝木皮為方丈室採草實以食鄉人聞其徙也從之
如初凡三徙居所至成市豈重華之有羶行莊周所謂

全德何不言而化不召而至之如此乎師徧閱金仙之
書深求祖師之旨一念懸解五蘊皆空雖寓跡禪林而
棲心道要端居巖石結志區外虛室生白精義入神乃
至授玉篇于東華得素書于黃石駭青虬而翳華芝神
交于彤鬋餽金膏而咽瓊液功成於俄頃步越峻嶺若
履平地年殆知命宛然童顏或天高月明萬籟俱寂必
攝衣杖策深入窮山俯絕壑之傍坐大石之上鷙獸馴
擾毒虺屏去咽氣養和踰月廢寢瞑目隱几彌年不食

忽與俗接未嘗自異固已飛名仙籙高蹈玉晨豈但蟬
腹龜腸吐納以蠲疾熊經鳥伸導引而為壽哉予少遊
風波之塗早別扮揄之里危未脫於羿彀疾莫造於醫
門淳化末請告歸寧師惠然訪我以長生度世之旨誨
予予正為利祿所啖旅火內迫且辭以未能去年出守
縉雲師前期未忘冥感潛契蓋以收視反聽未嘗夢想
者二十年及予南轅之夕師油然欠伸髣髴假寐夢遊
縉雲栢蒼之間若有靈仙真人授以金簡玉字之訣遽

遽形開之後恍然起薄遊之心及予蒞郡十旬師即振
錫而至盤桓數日便為仙都之行採靈首探隱穴旬有
八日拂衣言旋予得再膝席於郡齋瞻師眸子瞭然若
志已滿必吉夢是踐而至理玄同方內之人何從請益
丹臺綠檢非下士之得窺赤水玄珠豈離婁之能索心
期已畢歸艎靡留棹舉若飛目昭不及異日世緣既盡
宦遊亦厭終須揖浮邱之袂追赤松之遊大丹若成當
分我半劑得為地仙足矣豈但使雞犬舐鼎乎嗟嘆之

餘復永歌而為好

詩

跡寄浮屠教心將汗漫遊無眠長達曙却粒動經秋秘
訣神仙授靈苗洞壑求誅茅探虎穴投杖涸龍湫丹熟
爐應冷禪餘室更幽登山不累息入夏亦重裘名已標
真籍身猶隱沃洲逍遙訪巖穴迢遞別林邱徧覽縉雲
境還浮一葉舟三千功欲滿鶴馭恐難留

温州鼎從事永嘉集序

河東聶君昔從事縉雲日賦詩二百篇予既序之矣及
隨牒永嘉再見閏月所得彌廣凡七百章會秩滿北歸
假道敝邑又示予以新集且徵辭焉予才非患多學素
不足已嘗黽勉從命狂簡成文運族庖之刀一割猶可
毆市人而戰再鼓必衰深病未能豈足以辱而君之請
彌篤且予之讓莫諧固不暇揚摧而言但撮其梗槩而
已謹按君生齊魯禮義之國被陶虞文思之化方在髫
髻服膺儒玄徧討百家之言深窮六義之要以為詩者

妙萬物而為言也賦頌之作皆其緒餘耳于是收視反聽研精覃思起居飲食之際不廢詠歌門庭藩溷之間悉施刀筆鳥獸草木之情狀風雲霜露之變態登山臨水之怨慕游童下俚之歡謠事有萬殊悉裁成于心匠體迨三變遂脗合於天倪當其奉鄉老之書以詣貢部也袖詩千篇名動場屋宗伯推國士之遇異於衆人天子嘉制策之文遷為第一自是捧檄吳會改轅海嶠東甌舊壤於越遺俗民庶謹厚既卧理之有餘林嶺蔽虧

實賞心之斯會其或良辰美景賓朋宴集之盛名園別墅軒車遊覽之適公堂退食蹈泳無何之鄉王澤及人賡載中和之什寓物必賦援筆而成與夫陳思豆萁之詩止於七步淮南離騷之傳不越食時以敏言之蓋其倫矣然君之于詩也類解牛焉投刃皆虛譬射鵰焉舍矢如破彼唇腐齒落者所貴乎少我取其多彼筋驚肉緩者咸謂之難我以為易獨擅一源之利不見異物而遷扣寂求音應之如響觸物成詠思若有神蓋孔子云

少成若天性習貫若自然斯之謂也矧乃酌之不竭鑽
之彌堅兩郡之間千里而遠玄祠佛剎罔不標題都人
士女悉已傳誦南山之竹可盡而雅言無窮東郭之篋
雖疲而逸材方騁英詞滿於裔壤藻思泄於尾閭蓋猶
夫吳王金錢往往有之淮陰將兵多多益辦者已方將
捧持素業奏御天子予固知採其頌聲埤于樂府被之
管絃薦于郊丘有日矣至如升金門上玉堂履赤墀之
塗登文石之陛亦將在是舉也稽古之力其可誣乎謹

序

羣公贈行集序

予至道三年十一月受詔修先朝國書越明年八月書成奏御既而以太夫人有桑梓之戀求典近郡因奉甘旨九月詔領縉雲郡事拜命之翌日復留不遣再䟽懇激得請而行公卿巨儒臺閣髦士寮察之際朋從之間相率贈言以寵行邁者凡三十八人藻繡紛錯珠璧炫耀觀咸洛之市天下之貨畢陳入宋魯之邦先王之禮

盡在亦以見一時文物之盛豈獨為鄙夫道路之光昔者楚丘列諸侯之未有蘧瑗史狗史鰭公子荆公叔發公子朝分執國政故吳札歎曰衛多君子西京承三代之季有朱買臣吾丘壽王司馬相如主父偃徐樂嚴安枚臯膠蒼終軍嚴葱奇並在左右故史班稱曰漢之得人巍巍聖朝英俊咸集爵里鱗布頌聲奮發覽之者足以知多士在位周室以寧七子賦詩鄭志斯見何止金聲流于下國華袞被于薄軀而已哉既銓次成編輒數

述其事益取夫卜商作頌以冠二雅之首用無媿焉

羣公餞集賢錢侍郎知大名府詩序

昔漢宣帝有言曰國家不虞邊境有事左右之臣皆將帥也乃知登勇爵者不必專閫外之政服儒術者足以升大將之壇其所由來舊矣去年冬鑾輿北巡胡馬南牧乃卷全魏之地實介兩河之間駐蹕以壯其軍聲擒俘屢獻于行在既而振旅凱以入求節制之才疇庸舊臣作鎮茲壤庶頗年老不能用兵趙孟語偷未可為政

於是命大京兆長城公由冬官貳卿兼書殿史閣之職
出領府事軍中之務一以咨之且謂之曰倚卿為北道
主人使朕得高枕而卧矣寵錫異等祿秩有加十乘啟
行百壺出餞虬髯列侍師律載嚴鶴蓋成陰送車無數
予時搢紳大夫相與言曰汲黯卧治郡政自肅劉琨坐
嘯塞垣以清當使朔野無烽燧之驚生民免杼軸之困
偃息談笑立銷胡塵投壺雅歌益治軍簿俾天下之人
知敦詩說禮真將帥之具坐籌決勝敵百萬之師巍巍

帝皇知人而善任使也昔者季布治郡天子倚之股肱
申伯于藩吉甫形于歌頌蓋為詩什以道德美由是學
士承旨宋公而下作者凡三十人奇彩彪炳清詞藻縝
入孔子之宅金石絲竹以盡聞遊和氏之場珪璧琮璜
而皆在與夫七子之賦鄭志羣公之祖二疏蓋不侔矣
某外領使符歸在秋暮辟書始下不及王粲之從軍雅
言畢陳竊比卜商之作序蕪陋簡略何足以云謹述

送致政朱侍郎歸江陵唱和詩序

侍郎朱公以舊德名儒榮居禁署引年致政將及禮經
宴見從容屢以歸田為請封章激切且有乞骸之言皇
上重違桑梓之情式優筋力之禮不欲煩於耆耄予以
厚其寵章特拜文昌貳卿許歸江陵別墅宰邑以愛子
俾晨夕而承顏下詔於長吏令歲時而致問延見甚久
益推前席之恩賜予實蕃有助揮金之費給公乘以濟
行李供祖帳而伸飲餞祁奚老矣猶以政事而咨詢宣
父歸歟豈憂吾黨之狂簡天子恩禮之敦篤賢者進退

之光華行路之人形於歎息薦紳之士以為美談區區
二疏非可同年而語也大宗伯太原公嘉達人之知止
美公朝之尚德嗟嘆不足形於永歌為長句二百二十
有四言揄揚其事羣公屬而和者凡十有二人藻繡紛
敷琳琅焜耀登于樂府何愧中和樂職之詩布於郢中
足掩陽春白雪之唱雅言四達頌聲載揚俾貞退之有
光致風俗之歸厚太原公之意豈徒然哉某猥以非才
獲聯高韻曾乖量力寧足起予且奉話言俾之序引爚

火不息昔已接于餘光糠粃在前今復慙于首冠承命
增惕叙事非工僂俛含毫詞不逮意謹序

廣平公唱和集序

昔者鄭國名卿賦詩者七子郢中高唱屬和者數人善
歌者必能繼其聲不學者何以言其志故雅頌之隆替
本教化之盛衰儻王澤之下流必作者之間出君臣唱
和賡載而成文公卿宴集答賦而為禮廢之久矣行之
實難非多士之盈庭將斯文之墜地皇宋二葉車書混

同端拱穆清詳延俊乂皋夔稷卨日奉吁俞枚馬嚴徐
並在左右禮樂追於三代文物邁于兩漢有若翰林主
人大宗伯廣平公以才識兼茂治行第一登金門上玉
堂發揮帝謨潤色大業自太平興國迄今咸平凡歲星
再周於天矣而望實益峻體貌彌篤入奏武帳天子冠
而後見退食溫室家人問而不言挺山甫之將明推安
世之慎密作文章盟主實朝廷宗工天其或者殆以公
為儒林之木鐸也而視草之暇含毫靡倦形于風什傳

於僚友同聲相應發言成章乃至文昌正卿宥密元老
蓬邱之長蘭臺之英爭奇逞妍更賦迭詠鋪錦列繡刻
羽引商爛然成編觀者皆聳廣平公感交游之疇昔慮
竹素之淪胥休沐之餘孜孜綴緝為之七卷以傳於世
頌聲奮發爵里森布著於簡牘垂厥方來當使仲尼刪
詩取周南而居首班固著論稱西京之得人蓋風化之
所繫焉豈徒緣情綺靡而已猥令紀述蔑容固辭狂簡
孟浪慙于叙事云爾謹序

送人知宣州詩序

屯田郎某君稽古博達之士也始以偃商之文學決科
公朝終以龔黃之治行陳力官次凡再厯二千石皆以
課最揚于王庭今年解安岳郡章以博士蒞曲臺方講
求典禮討論故實裨補闕漏修起廢墜而有司舉考績
之典在尤異之目天子延見宣室勞問數四以尚書郎
職司起草羽儀中臺而戶口墾田漢官惟舊故以君領
屯田曹宣城郡號為奧區襟帶江左而雙旌六毒縣唐制

甚雄故以君行太守事拜命之日縉紳先生咸以某君
詩家者流而宣城乃謝公賦詠之地刻於金石被于莞
絃鏘然遺音猶在人耳而君勢均於六義之際神交於
千載之下吳中人士復聞正始之音楚客離騷且有江
山之助亦由冥數良為美談於是蓬邱栢署諫垣史閣
金閨之諸彥鴻都之碩儒莫不健羨景慕形於詩什或
嘉其地雄萬井慰壺漿來暮之心或嘆其道出故鄉有
弩矢前驅之盛或稱清白之節與關西而等夷或序離

索之情劇河梁之悽愴至於述江南之佳麗談謝客之
風流地勝人賢殊特共貫其歸一揆蔑有異辭矧昔人
云亡為日滋久華輶繼軌名氏實蕃焦桐絕絃賡載殊
寡而君擅當世之譽為羣公所稱嗣續音徽聳動吳會
亦猶京兆善政前有趙張姑蘇能詩後推劉白豈偶然
哉君以治劇之能奉求瘼之寄所宜宣布王澤激揚頌
聲採謠俗於下民輔明良於治世當俾中和樂職之什
登薦郊丘豈但亭皋隴首之篇留連景物而已集賢右

史彭君實君之執友且緘諸公之作咨予為序如窺武庫駭神鋒之照人幸過屠門聊大嚼以快意輒茲冠首深用厚顏云爾

與內弟李休復序

隴西李生子之內弟也纔十數歲能屬文善楷隸性端謹介特外直而內溫不讀非聖之書不入非類之室孜孜為學匪懈州里之內名稱藹然咸平二年奉鄉老薦書就試春官氏實在高第揚于王庭天子以其新進少

年欲抑之俾進其業遂用旅退曾不屑懷去年本郡凡貢士三十八人實冠其首西望而笑與計吏偕方摩厲以須虛憍恃氣將乘長風而破巨浪運溟海而徙天池適有功總之喪不克其志懷寶待價豈慮迷邦杜門燕居亦云知命斯可尚也一日再拜而言曰夫名以定體有自來矣始肄業鄉校名宗元及舉進士更之曰瓊由瓊已來一不利見再不克就試禮部求所以易之者予應之曰復之六二休復吉象曰休復之吉以下仁也蓋

得位處中協比初九初九有仁德而能附順之所以為
親仁善鄰之象復之休也左氏傳曰親仁善鄰國之寶
也語曰德不孤必有隣夫七日來復天地之心也照鄰
殆庶顏子之德也處復而休擇鄰以德非君子儒者其
孰能從事於斯矣宜更名曰休復字德鄰若乃率性循
道自誠而明復之體也邁種務滋聿修無忝德之度也
所宜探中庸性命之理無或怵迫親大雅明哲之士與
之切劘使衆妙玄同虛室生白鳴謙受益心佚日休勤

而行之進吾往也固當立功立事為世偉人豈徒發策
決科智効一官而已古人恥名浮於實幸吾弟勉之哉
外兄某序

送四十舅翁東遊詩序

武寧茂才章公實先大夫之叔舅某之事公猶大父行
也始委質江吳為郡文學值金陵版蕩閩隅繹騷貞退
邱園不交世務及文軌混一聲教漸暨乃徒步萬里來
詣公車上書大言初慕方朔之自薦閉關却掃遽同馮

衍之空歸自是屬鄉老之獻能隨計吏而西笑凡累詣
貢部皆敗於垂成蓋燕谷冱寒陽和靡及齊庭濫吹雅
鄭相傾終以不伐之姿困於新羈之足今年春官氏益
艱其選材三十取一意公必在籍中逮揚于王庭又闕
其名氏噫淹速之度有命在天實由數竒且非戰罪復
何足町畦於胷臆鬱陶乎心術哉昔平津六十始發策
決科卒登三事之位孟明三戰乃濟河焚舟終雪再北
之恥苟誠志敦篤德義充富雖日月之增逝終富貴之

來逼亦不必充詘隕獲倒行逆施然後為善宦也關東
有賢侯汝穎多奇士行當曳裾公府裁冠初筵為元戎
之上客亦復升堂拜親傾蓋授分與諸生而締交繇是
名動京師聲振場屋拾芥甚易夫何遠哉韞櫝待沽在
此舉也皋壤黃落當拜迎于夷門之下車馬行色輒抒
意於河梁之篇非足風雅之云聊導離濶之思云爾

詩

首夏清和月異鄉羈旅心丹枝未入手華髮不勝簪又

出夷門去還過汝水陰何人富高義相贈橐中金

送集賢李學士員外知歙州序

昔漢明帝云郎官上應列宿出宰百里王坦之亦云尚書郎正用第二人何得以此見擬當時雖含香握蘭趨走丹墀未甚重也爰暨唐室稍盛其選由諫官御史次補者為美遷迄于皇朝地望彌峻制有侍講金華之殿待詔玉堂之署典校天祿閣更直紫微垣外之即建行臺刺列郡持使節總百城故臺郎之貴過曩時遠甚集

賢學士屯田外郎李君在興國雍熙中以文雄於場屋
太宗皇帝凡五臨軒試郡國貢士君以英才傑出策名
甲科自爾隨牒於淮淝間為諸侯所賓禮奏伎記室檄
成而愈風案事隣州獄決而得雨入佐著作改丞太常
掌禮秩宗閱書廣內既而宰邑吳會有絃歌之音校文
成均正魯魚之謬英華外發名聲日聞天子知其藏器
在身勞謙不伐特出中旨召試禁林翰動若飛文不加
點北門諸公抵掌歎伏翌日受詔兼直書殿君蹈泳亨

衢翺翔近署誠衡遇物靡有低昂量陂虛受不聞澄撓
天球擅響雅鄭洞分水鑒忘情毛髮皆見為士林之圭
表亦人倫之著蔡每太液波淥汾睢草黃或御酒百壺
式陳鎬宴或卿雲五色垂示天章君必沾玉笋之醇醪
聯栢梁之高韻賜花奪錦肯讓景龍時人桂水空梁無
取南朝之體此外風規醞藉不雜塵游驅放玄虛善談
名理求之一時未易得也君屏跡勢利游心虛白踐赤
墀而登文石非所宴安拍洪崖而挹浮邱是其雅素且

以新安山水之奇秀江左人物之瑰瑋嚴助饜承明之
廬勞於侍從阮籍求東平之守樂其風土實奉俞詔歡
然愜心夙興戒徒星言行役噫錦帳綾被有中臺之禮
秩金匱牙籤有延閣之官次懸龜曳組建隼剖符驛吏
駕車而來迎縣令負弩而前引千騎駸駸而挾轂諸曹
冉冉而趨府載櫜戟以先道露黻冕以行春四十歲專
城而居雖盡美矣二千石與我共理厥惟勉旃行矣火
雲吐峰汴流激箭仙舟東下何翅一葉之輕旅雁北征

勿忘尺題之貺其他即暮月報政朝廷賞勞幸預代言之末願草陟明之詔云爾

送元道宗秀才序

昔夏侯勝有言曰士患經不明經苟明其取朱紫如俛拾地芥耳至乃抱荆山之璞猶聞待價操流波之引未遇知音蓋有淹速於其間夫子之所以罕言也河南元生出東南之美族稟山川之靈氣學術淵奧才思深婉雅善詞賦尤工詩什每扣虛課寂緣情體物必有警策

傳誦人口左氏之筆微為富艷相如之文長於形似翹
翹然秀出於場屋間矣有難弟焉有令子焉皆以俊才
著稱素風彌劭天倫敦睦庭訓嚴厲友于推讓士類多
之矧復內行修飭至性純孝閱市以資力學負米以潔
晨羞至於造請諸公不避寒暑博極羣書罔捨晝夜此
又勤即不匱艱而彌貞者已有若大丞相僕射東平公
鄧帥長城公皆坐鎮雅俗懸衡吾道嘉生之才美咸賦
詩以贈之此亦神物求之不可得也逮夫綸闈書殿三

臺內閣英髦雜集風鑑攸出見必倒屣坐多更僕接夷
甫之談柄知名理之斯在挹紫芝之眉宇覺鄙吝之都
忘當時名儒推獎如此而再試貢部敗於垂成益云數
竒實非戰罪寄食輦下有索米之嗟薄遊關東無解榻
之遇歟起北堂之念遽賦南陔之吟與仲氏而言歸拜
慈親而為壽姑欲賣負郭之產扶安輿而來棄八閩之
繻作焚舟之計決策素定戒途有期陸士衡之弟兄暫
還吳郡翟方進之母子同入京師行矣為我語姑蘇父

兄無或笑馮衍空歸輕蘇秦未遇以目皮相人作兒女
子見異時懷丈二組駕駟馬車衣繡而過里閭揮金以
報故舊此際如下鄉亭長為德靡終洛陽妻嫂不敢仰
視徒厚顏爾明年春蟄戶震驚河流湍激當冀除蔽廬
以俟子之西笑

送張泌之毗陵詩序

義興陽羨山水甲於江東張子巨源慨然發仁智之心
飄然有登臨之興葉舟東下蘭友與俱梁園雪飛汴流

日淺榜人宿戒祖席晨張於是京洛貴遊之賢鄉闕布
素之執河梁惜別並愴離羣澤國贈行咸抽祕思風雅
之什爛然盈編又何必雜佩兼金然後充乎巾橐也行
矣三吳之地素多賢豪十室之邑必有忠信雖君子在
位巖穴豈無於隱淪矧善人為邦閭里已臻於富庶儻
能為我擇爽塏營別墅當使夫陳力不能奉身而退受
一廛而為氓與萬物而共盡此所望於子也庶乎勉旃
獻歲發春遲子西笑

佛祖同叅集序

昔如來于燃燈佛所親蒙記蒞實無少法可得是號大覺能仁既而後智滋興悲心顯發念四生之沈溺輪迴六趣之中為一事之因緣出現五濁之世柰何根器各異機感有殊繇是開三乘權實之門設一時頓漸之教具偏圓半滿之義分悟證伏斷之差演之為十二部經廣之為百千萬頌隨類各解始雖自於一音達本忘言終乃同于二月故純陀未供之後鶴林示滅之辰以正

法眼付大迦葉內傳真印外授信衣作世導師為佛嫡
子凡二十七世至達摩大師哀此土之人昧即心之理
分別名相而不已類入海以算沙攀緣生滅而為因但
認賊而作子聿來震旦宴坐少林不事語言不立文字
既得人而傳付乃趣寂以返真是為東方之初祖也自
爾本係相承旁支別出敷華結果五葉之讖可徵續燄
分輝千燈之照彌廣至於出離生死一門証于涅槃誘
導愚迷萬行以之差別由二祖而下迄至于今以諸夏

之利根叶西土之懸記得道之者實繁有徒其或抵掌
盱衡乃了知於風力搖唇鼓舌即悟入于言樞或針芥
相投金鑰立辨或經塵將破啐啄同時示現方便以既
殊遭值因緣而亦異咸有軌迹著為筌蹄譬諸三藏之
文結集於鉢羅之窟七佛所說祕藏于娑竭之宮苟撰
述之無聞使後來而安仰先是諸方大士各立宗徒互
顯師承迭存語錄圭山患其如是也會合衆說著為禪
詮融通諸家圓成一味蓋祖門之能事畢矣厯歲彌久

都序僅存百卷之文不傳於世東吳道原禪師者乃覺
場之龍象實人天之眼目慨然以為祖師法裔頗論次
之未詳草堂遺編亦嗣續之孔易乃駐錫輦轂依止王
臣購求亡逸載離寒暑自飲光尊者訖法眼之嗣因枝
振葉尋波討源乃至語句之對酬機緣之契合靡不包
舉無所漏脫孜孜纂集成二十卷理有未顯加東里潤
色之言詞或不安用春秋筆削之體或但存名號而蔑
有事迹者亦猶乎史記之闕文或兼採歌頌附出編聯

者頗類夫載籍之廣記大矣哉禪師之用心蓋述而不
作者矣嗚呼法界無際衆生無邊凡厥有情莫非同體
終日圓覺觸目真如而迷失妙明增長虛妄分別影事
牽制於六塵積集苦因流浪於三有善知識愍其如是
也不歷事相直指本源但一念不生即三際俱斷十方
消殞諸聖現前識珠在衣匪從他得如金出礦豈復重
為圓頓之門妙如此矣稽所證之道然後知原師也生
如來家真法王子究所詮之理然後明斯集也了第一

義真最上乘當使末法之年初心之類去聖逾遠開卷
得解一彈指頃齊肩古佛不起于座入般涅槃雖利益
之若斯於滅度而無取即知施七寶而滿刹上徒為漏
業之資化二乘而等河沙適重敗根之罪師之法施豈
思議之所及哉新集既成咨予為序聊撫梗槩冠於篇
首云耳

諸公寄題建州浦城縣清河張君所居池亭詩
序

茂才清河君於予蓋鄉先生丈人行也頃者書軌未同
齒血猶壯不掃一室有志四方薄遊九江講學廬阜勵
精文史既素業之大成歸省庭闈值戒車之適駕未幾
青蓋西上先正從行喬木懷安族人攸庇亢宗裕蠱且
肥家之是圖委質策名于觀國而何暇雍熙二年仲氏
舉進士中乙科淳化三年季弟隨計偕列高等推讓致
美君之志也俄而先府君捐館壽陽犢車歸葬先夫人
啟手故里駒隙終喪商於解印而歸叔庭既冠而逝實

有天倫之戚無復西笑之心且欲沒齒田園放懷林壑
與浮邱把袂為羲皇上人其所居也背山臨水占奇據
勝累世增葺極為輪奐曲池皎鑒修梁橫度虛閣崛起
反宇凌空雲山蔽虧魚鳥聳聳賞心肆體斯焉取斯予
淳化四年由書殿得告歸迎版輿時君膝下承顏友于
歡讌置酒危榭酣飲終日子亦斐然成詠題於梁屋及
咸平三年罷郡縉雲復造仙墅君且永懷罔極痛深終
鮮逝者如此靈光歸然予是用追感疇昔賡載前唱今

年君奉本郡計籍來上中臺蓋因縣次之續食將與故人而胥遇君之愛子實吾家之宅相而予之外弟也往年隨我肄業上都刻苦讀書三餘之習無廢孝謹成性萬石之德不衰君亦既見止彌加教督會稽栝羽何用不臧于公里門於茲必大君戾止未久歸歟興歎且以鄙夫昔留池閣二詠及羣公佳章俾之示朝右之賢庶乎知隱居之志安定大諫趙郡閣老及上邽富春晁陳諸紫微暨祕閣潘公咸樂善無厭慕義不足競挾秘思

發為雅篇千里寄題豈人遐而室邇七閩傳誦蓋玉振
以金聲誠足為吾黨之美談寧獨光幽人之肥遯予與
君先疇接畛雞犬相聞奕世聯姻絲蘿有素早親長者
之論備知高世之行因叙始末用冠篇首云耳

送倚序

我之先由永嘉之難避地江外占數於上饒及劉展之
寇又遷於閩粵治產殖貨以財雄於建安世為彊宗高
上武力唐室之季亂離云瘼禮樂征伐不出本朝無種

而起為王侯稱兵而分據州郡故王氏奄有無諸六郡
之地盤互交錯莫非勍敵候望走集悉嚴兵備故我內
外家世皆服縵胡而冠武弁總輿師而提尺籍輜輶鼓
吹盛於一方而羣從叔季憑藉世資習尚豪舉競養聲
利爭為節俠唯玉山府君勞謙降志刻苦讀書好學之
名聞於州里以孝廉射策委質江吳以儒雅從政仕至
宰邑無何黃旗運盡琴堂秩滿考槃故里啟手歸全太
常府君博涉藝文尤深左氏終鮮兄弟不遑充賦未及

中壽邁茲大禍家無擔石之蓄門無強近之親藐視諸
孤朝不謀夕我是時以一命為蘭臺正字尚未及志學
之歲遽罹憫凶將就死滅爾曹皆非角稚齒俱未成人
田園污萊裘葛不具堂構頽替弓冶漸微既泣血終喪
即割慈遊宦艱難險阻備嘗之矣既而索米都下薄遊
外郡又三歲以文三十編獻於公車始得為太常奉禮
且有中旨閱書於祕府日享公膳月受俸緡未能亢宗
財足餬口而太夫人與汝曹仰給薄產終歲食貧我又

智効一官相去萬里晨夕引領不覺涕之無從也我亦
進德礪行修詞聚學又得冊府祕書夙夜研習曾未期
月頗有文章出於人間為前輩所許又頻詣司馬門獻
賦頌天子益知名凡再歲間一召試內署一應制行在
得光祿丞賜進士第復受詔直集賢書院星律載周寵
光舉集稽古之力豈誣也哉得祿既豐思養彌切削牘
為奏賜告言歸自建安扶迎太夫人并挈汝曹盡室西
上僑寓輦轂殆茲歲星一周於天矣而我以不肖之質

中人之才黃屋過聽擢司雅誥敢不摩揣鉛鈍勵精夙
夜期有以潤色帝載與三代同風柰何力不逮心位過
其量歲祀逾久官謗囂然不能上封自劾樸被引退乃
猶束帶就列俛首取容碌碌於薦紳間亦顏之厚矣今
年汝舉進士有司薦名我時侍從穆清親逢旦暮天子
又賜汝高第自丙科而升乙科俄頃之間恩獎蕃縟汝
之仲兄及季弟比年來聖人誕生之辰延賞近侍並得
解褐試秩蓬邱每朔旦列拜膝下私門嘉慶歲時伏臘

捧觴上壽懷黃佩玉趨走左右固足以慰太夫人之心而伯仲森列門無白丁亦足以為鄉曲之美談交遊之光寵也今汝申天官調補掌簿四明期以來年往代其任且將歸省松檟盤桓里閭俟春夏之交乃蒞厥職汝當念為士之道以仁義是務而閒宴不可忘為吏之方以法令是師而資材不可強事上貴乎恭而慎於諂臨下尚乎簡而懲其違至於淳素之風清白之訓蓋我之家法耳豈復鄭重而言之哉若乃博約文史切磋道術

此又朋友之事也吾何與焉汝之歸吾黨之人有問於
我者為言受恩寢深涖官無狀如衛鶴之有祿位若社
鷄之載車馬悲愁憂畏不遑寧處幸天子一旦澄汰流
品考覈名實不能者止奉身而退固願返初服奉版輿
從諸鄉先生優游以卒歲也

武夷新集卷七


謹案卷六第二頁後一行萬國麋至原本麋訛麋
據左傳改

第十三頁後六行魚鳥聲取而物態咸見原本聲
訛聲據唐陸龜蒙詩魚鳥空聲取改

第十六頁前二行崇墉嶽峙原本峙訛峙今改

第十六頁後六行爰畢於墜塗刊本墜訛概今改





總校官庶吉士臣張能照

校對官編修臣閔懋大

謄錄監生臣吳魯田

欽定四庫全書薈要

集部

武夷新集卷八

九

詳校官助教臣常循



欽定四庫全書薈要卷一萬四千一百六十三

集部


武夷新集卷八

宋 楊億 撰

碑二首

宋故樞密副使正奉大夫行給事中上柱國廣
平縣開國伯食邑八百戶食實封貳伯戶賜
紫金魚袋贈尚書吏部侍郎宋公神道碑銘
并序

昔許穆公卒于師春秋重其死王事贈公哀以褒德岑



江陵薨於行天子嘉其盡臣節罷宵警以申恩皇上巡狩兩河駐蹕魏郡惟樞密副使宋公典掌機要務煩傷神得疾膏肓終於道路輟視朝於行闕申追命於泉扃痛深股肱見君臣之同體布在方策實今古之相望所以旌忠魂於九原鐫休光於百世者也公諱湜字持正其先廣平人也自微子歸周商丘啟國胙土命氏源深流長處荆蠻者才亞於騷人仕東漢者名叅於循吏或樹勲於代邸或馳譽於南朝支葉扶疎華實蕃衍公之

遠祖占籍關中隱德未融重世始大曾王父澤登州牟
平令王父贊雍州萬年令皆以時命之數屈於州縣咸
有清白之訓遺於子孫烈考溫故晉天福中擢進士第
累遷右補闕文雅之譽流於京師骨鯁之風播在臺閣
及公之例累贈工部尚書公即其次子也襟韻閒曠風
規爽邁凝脂點漆宛是神仙中人虛受兼容居然廊廟
之器爰自髫髻卓然不群了無童心靡雜兒戲初入小
學比及大成恣閱黃卷聖賢之言蔑聞青衿城闕之刺

既而究六經之微旨通百家之雜說服勤學問日引月
長刻意著述朝成暮傳跡在丘樊名振輦轂方隨鄉老
之薦適丁先君之憂藥棘傷生幾於滅性苴麻終制始
讓干祿太平興國五年春太宗凡三臨軒親選多士公
提筆就試思若湧泉煥乎成文曾不加點諸生方當於
燥吻一人已喜於同時賈勇先鳴拔乎其萃由是一上
登進士甲科解褐將作丞通判梓州權鹽院就拜太子
右贊善大夫歸朝改著作郎直史館中謝日賜緋衣銀

魚雍熙三年今工部尚書王公化基以諫官佐計相上
書北闕自薦其材太宗方求非常之人待以不次之位
謂宰相曰李沆宋湜皆佳士也可并試之即日召試制
誥於中書明日除右補闕知制誥與二公并命焉當時
朝廷有得賢之議就轉庫部員外郎兼判尚書刑部面
賜金紫會有妖尼訴廷尉斷獄不平公職當詳讞未嘗
發擿坐是左遷均州團練副使公論惜之移汝州數月
徵拜禮部員外郎直昭文館復以職方員外郎掌誥命

踰年入翰林為學士轉兵部郎中知審刑院銀臺司封
駁事皇上嗣位真拜中書舍人修國史並兼內署之職
俄丁皇妣扶風縣太君淳于氏憂柴毀骨立柱而後起
五十而慕昔人所難七日絕漿僅成死孝纔卒哭詔起
復視草禁中公泣血抗章願終喪紀優詔敦勉不允其
請是年冬改給事中參貳機務明年大戎犯邊翠華時
邁樞機之任一二咨焉露版羽書實司其緩急伍符尺
籍專校於耗登乘保鄣險走集者稟於弛張發號令圖

方略者出於規畫乃至議將帥之能否授以指蹤揣蕃
夷之情狀辯其狙詐折衝樽俎之際制勝帷幄之中料
敵若神謀事鮮過任重責大巧勞智憂而公與今襄陽
王丞相并掌其職公竭力盡瘁知無不為蒙犯風霜勤
勞夙夜陟降帝右咫尺天顏總領萬幾便蕃三接焦心
極慮外彊中乾十二月癸酉上御武帳召近臣議邊事
公方指畫上前俄疾作仆於地若大醉狀不能知人同
列競前扶之上命中貴人扶掖以就西序亟令太醫切

脈且曰疾不可為也上憂形於色日夕候其安否明年正月乙酉乘輿親至卧内存問公以所疾未愈懇乞先歸面可其奏且以御衾褥為賜仍命中使備肩舁什器帷帳湯藥飲膳送還京師既發又令近臣慰遣於郊外已丑次澶州憩於法寶寺是夕以不起聞享年五十有一上歎息久之詔贈吏部侍郎輟視朝一日命使者護送靈柩歸于上都緣葬所須并從官給公比及彌留且有治命曰上遇我厚必鹵簿葬我生無益於國死豈可

煩於人諸弟等表其緒言上深所嘉美詔以錢五十萬
絹五百匹米麥百石賜其家以備襄事即以其年十月
癸丑歸葬于京兆府長安縣義陽鄉大郭里從先尚書
之兆域禮也公娶清河張氏封本郡夫人婉嫕柔嘉幽
閒令淑仁洽宗黨教成閨門二子長曰綸以延賞之恩
解褐太常寺太祝年甫七歲次佛奴尚在襁褓三女長
適屯田員外郎楊坦其二皆幼公生孝謹之族負王佐
之才幼能屬文談必稽古尚書府君之捐館舍也季父

溫舒以左拾遺守華原郡公實從行府中牋奏皆令代
作公口占五吏應接不休日發百函親疎有意季父拊
背嘆息曰真我家國器恨吾兄之不見也至性純孝出
人遠甚奉養慈母烝烝膝下調滌澣以供膳衣文綵以
承顏左宦方州單車獨往盡留妻妾給侍庭闈杜門端
居曾不屑慮及太夫人寒暑邁疾膝理寢深公藥必先
嘗目不交睫禱神請代指景悼生雖曾閔之行無以過
也長兄泌職方員外郎越王府記室次兄澣皆先公而

逝弟湛任大理寺丞推以友愛成乎敦睦棠棣致美塤
簋相須天倫之歡士林聳慕耀州富平簿渙太子中允
沆處士解進士洞殿中丞濤校書郎澹皆公之從父弟
也公承高門之慶為保家之主協比諸弟糾合近親人
不間言兒無常父宦成名立率由於公游吉之亢宗張
仲之孝友見於斯矣公自決科筮仕影纓登朝至如羊
舌肸習於春秋而公分直東觀裁成國史公孫揮善為
辭令而公入叅右掖發揮王言雋不疑之治獄也多所

平反而公當祥刑之任民以不寃山巨源之薦賢也密
陳啟事而公操審官之柄下無失職嚴安徐樂並在左
右而公步武禁林潤色帝載劉放孫資對掌機密而公
徊翔丹地秉執國鈞至於蹇蹇匪躬巖巖羣望外庭集
議不曲從而詭隨宣室論思必有犯而無隱此詩人所
稱邦之司直又如循循善誘拳拳好德博施以濟衆功
成不居虛已以待物事至而應此仲尼所云古之遺愛
雅性冲澹留心釋老早歲嘗受道籙晚節頗究禪筌悟

茲無生用成達觀素善持論酌之不竭多識典訓扣之
斯應挹量陂者鄙吝之意自泯窺眉宇者名利之念都
息接士在貴而思降定交彌久而益恭德邁種而愈勤
人服媚而無斃蹊成桃李夫又何言室有芝蘭但聞俱
化非大雅明哲豈能及是耶公方以將相之才輔文思
之政談弭兵之術議平戎之策使單于之首懸之橐街
遼陽之貢陳於宰旅致君堯舜為宋伊周而兩楹邁炎
二豎為沴天不憖遺人之云亡召公深仁徒結甘棠之

愛留侯素志莫遂赤松之遊藐是諸孤庶乎有後常所
著述遺札頗多自掌命書尤振時譽累當大手筆之事
皆為士君子所伏集二十卷傳之子孫諸弟等以總帳
猶懸宿草將列憂陵谷之或變慮德音之不昭謀建豐
碑以表神道以某嘗學舊史曾接生平得以祖述世家
論次闕閱叙太丘之德諒無媿詞非臧孫之言敢期不
朽聊撫梗槩以為之銘銘曰

火德淳耀文明誕敷鳳鳥斯至神龜負圖時惟宋公矯

翼雲衢五百之運其在茲乎黃離繼明百度思治盱食
臨朝齋居決事時惟宋公將順其美咸平之政既盡善
矣八柱承天七聖翊軒彌綸袞職斟酌化源青蒲伏奏
溫樹無言林父忠蓋康侯錫蕃三邊屢聳六龍順動借
筭前籌屬韃景從美疹弗瘳吾謀猶用城郢遺言涉洄
占夢梁木斯壞太素收神易簣而沒委順全真精爽何
託上騎星辰如可贖兮人百其身行路咨嗟晁旒悽惻
股肱或虧其痛何極尸諫猶切忠魂彌激臨死之言不

忘社稷卜葬咸陽著蔡弗違封樹云畢閔茲音徽自古
有死吾將疇依逝者可作非公曷歸丘壟陵夷光陰迅
駛傳信方來孰非文字乃刊貞珉式表幽隧懷公之人
於斯墮泪

重修亳州洞霄宮碑銘

并序奉
勅撰

臣聞昔者大道之行異人間出洪惟柱史實暢真宗叙
道德之二篇述慈儉之三寶玩志衆妙理洞於帝先垂
訓方來尊居於教父故尹喜望氣爰識真人史遷編年

首推黃老或謂之隱君子著書五千文或以為太史儋
享壽二百歲立言垂于不朽乘化入于無間惟苦縣厲
鄉即降神之地土風雜乎南服郡境介於陳留蓋尸而
祝之崐崘作庚桑之社思且愛矣陝郊存召伯之棠後
人緬慕玄風周爰舊壤聿因靈迹肇建嚴祠歷代封崇
樵蘇之禁彌肅昔賢讚述金石之刻具存又往者聖質
誕祥元符冥合乘白鹿而下爰自九天感流星之精生
于左腋指李樹以為姓由聃耳而立名稟粹斗魁發祥

井脈僉以為塗山祀夏式修啟母之祠后稷配天乃建
姜嫄之廟恭惟聖母實育至人陵谷未移光靈如在又
因遺址別啟殊庭目之為李母祠蓋有年矣雖潔粢致
享不領天子之祠官而閒館棲神具載職方之地志歲
月寢遠遺構僅存期運環周祥符顯發施及唐室系自
仙源乾封中以錫羨流光肇開鴻緒似續蕃衍襲慶本
支且念太極之先冠二儀而首出盛德之後垂百世以
彌昌追崇長樂之名用顯始基之迹繇是追封聖母為

先天太后又以列真之宇神光燭於宮壇集靈之虛紫氣
干乎霄極琳房絳闕窈窕重深孔蓋翠旒裴回戾止蓋
方輿之福地乃虛皇之密都由是改命祠宇為洞霄宮
香火無廢於熏修棟宇益增於輪奐南望吾子飛觀凌
雲左帶靈溪清流漱石行人杳畏頗類軒臺遊者忘歸
更疑秦洞至乃玄貺昭格冥感彰聞或旭景朝躋非烟
絢綵或柔條夕勁甘露垂滋或千仞鳳翔覽德輝而下
集或九井龍見乘雲氣以上騰往昔海縣塵飛萑蒲蟻

聚流矢集屋束蘊乘墉即必黑氣塞川愁霖貫序兇黨
不能肆毒闔境率以寧居當時降璽書以旌揚垂方策
而標紀求諸故府蓋圖謀之未刊巋然靈光實神明之
所庇皇朝接千載之統按九州之圖包舉海隅并走羣
望講求祀典咸秩無文誕揚清淨之風式契玄元之旨
深詔譙郡崇奉靈場繕完靡虧焚修彌潔崇文廣武聖
明仁孝皇帝之在宥天下也恭默思道齋慄事神紹祖
宗之耿光集乾坤之景命端拱南面唯軫念於蒼生間

宴西清乃娛情於玄牝順風之拜幾慕於崆峒赤水之
珍靡徵於謏詬驅民壽域日用而不知決事齋居天行
而彌健乃至探求三五之載籍致恭上下之神祇黍稷
犧牲悉用先王之禮壇場珪幣無取方士之言正違治
煩修弊起廢陳信策告蔑聞秘祝之官備物薦嘗奚餒
若教之鬼乃至山川作鎮於地出雲雨以嘉生卿士有
益於人垂竹帛而悠久莫不咨詢典故彌縫闕漏豐潔
必芬而致用聰明正直之是依用能陟降泰時與三靈

交歡端委明堂俾諸神受記帝錫純嘏百祿是膺洛出
圖書九疇式叙盛德大業光表格天固非名言之所能
及也乃眷亳社時惟穀陽仁里未遷清都斯在曩以神
虬躍於沮澤陰魄離於罕車雩禱偶憊水潦荐降雲不
待族雨及我私甫田或害於粢盛樊圃幾勤於浸灌是
宮也雖面勢爽塏取規大壯在山濛濛稅於焉勝人非
麥麴鞠窮何以禦濕屋瓦斯漏梁木其摧本郡以聞當
陽太息即日降明詔遣近臣案行故墟周視層構度費

制用庀徒僇工之子于垣百堵皆作靈臺經始不日而
成雲鍾募農隙之民風斤得藝成之匠朱扉洞呀於廣
陌紺殿崛起於中天棖桷交持見陰虬之騰倚觚稜四
注狀名翬之翰飛繪素彰施模睟容而克肖吉蠲享獻
表明德之惟馨空歌洞章蕭寥乎旦暮颿輪歛駕出入
於虛無固以昭戩穀於聖神夸壯麗於方國契宸心於
妙有躋氓俗於無何行將追七十二君告成功於日觀
享萬八千歲比聖歷於天皇玄同至真永錫難老如斯

而已矣秋八月新宮成主者上言願志能事大君有命
允屬下臣臣學古非優聞道素淺草寬大之詔無東里
潤色之才談惚恍之宗增吾黨狂簡之媿躑躅燥吻謹
為之銘其辭曰

至哉玄元權輿太極象帝之先昧者奚覲矯矯伯陽自
天生德其道猶龍人靡能測厥初誕祥時惟厲鄉領垂
縞髮室照神光蹈十把五舌舐而長井泉湧脈星精耀
芒集靈之址玄祠崛起檜亦手植樹魯親指聖母遺阡

右環渦水福地旁連清都對峙瓜瓞其昌錫羨於唐寶
冊追諡雲篆龍章金闕易號丹臺絳房明靈如存祀典
不忘帝臨赤縣乘正御辯致恭神祇大庇黎獻德馨流
聞沼毛登薦鬼有所歸民亦不倦帝居紫宸味道全真
格天在宥易俗還淳陰陽大順闕石和鈞亮采時叙輝
光日新乃眷東顧欽崇教父定之方中增修祠宇閒館
相望飛輶攸駐日薄星回池平樹古申命中人王言如
綸鳩工底法即舊謀新三時之隙百日之勤恍若神化

以棲靈真瞰鮮原兮靡迤面皇州兮密通氣翕蔚兮上
騰波奔淪兮東委唯列仙之殊庭干青霄兮特起竦金
閣兮崔嵬薦蘭蒸兮裴回緘紫籙兮難見秘靈符兮不
開伊九天之神母御瓊輪兮下來祝聖人兮富壽延寶
曆兮京垓又何必迎年之館兮通天之臺

表一首

故信州玉山令府君神道表

玉山府君以太平興國三年六月三十日啟手足於長

樂里之第其年十二月八日歸葬於南原凡二十三年
矣金石未刻陵谷將變嗣孫億大懼夫祖德之墜於地
考於譜牒詢於耆艾追述先美以表幽壠云府君諱文
逸字慕賢華陰弘農人也昔周之伯僑始啟封邑胙土
命氏實曰楊侯瓜瓞蟬聯大昌厥緒在西漢時重侯累
相施及魏晉世為公卿永嘉之亂播遷江表始占籍於
上饒郡因為郡人焉安土重遷凡十餘世唐上元中劉
展稱亂吳會弗寧府君之六代祖始挈其族人避地於

建安之吳興斬木誅茅築室治產以財力雄於州里以義方訓於子孫曾王父式蹈德詠仁隱居求志王父部屬唐季倣擾干戈日尋奕世聚居羣從百口非用武斷不能亢宗於是募鄉民之拳勇者數百人受署於本郡為義軍指揮使堅壁要害以備不虞一邑賴之終以無患烈考弼遭時未又結髮從軍受署義軍討擊副使府君即副使之次子也始在童丱遨遊膠庠博習親師服膺素業家世從戎旅之事以豪舉聞於郡中而府君恥

事輕肥雅好學問被服造次必於儒者識者以為秦莖
父之生丕茲也時王氏偏霸閩隅府君世父太常君實
為邑令以猶子之愛推延賞之典纔十餘歲解褐試秘
書省校書郎未幾丁副使君之憂泣血執喪殆於滅性
純孝之德鄉黨稱焉及王氏乖離吳人致討建安失守
歸於金陵改右千牛衛曹叅軍知建州倉事克遂循
陔之歡靡辭掌庾之賤就加本尉騎曹叅軍先夫人寢
疾彌留府君即解所職調品藥餌供視膳羞目不交睫

衣不解帶如是者凡歷三時而卒以不起府君勺飲不
入嘔血數升柴毀支離僅成死孝服除調補撫州南豐
簿視事踰月化行若神先是邑人常以端午為競渡之
戲具舟數十艘聚羣不逞之徒以較勝負必先載瓦石
因以相擊每歲死傷者數十百人府君前知其然至期
大索笞其為首者數輩訖事無變獄訟衰少縣政益清
秩滿擬常州武進丞辭不之任改大理評事信州玉山
令邑有鎮兵兼總軍政府君寬以御下明以照姦流亡

悉歸版圖增羨先甲發令卒乘畏威泮林革音寇盜屏
跡境內大治政聲流聞就加大理司直示陟明也未幾
王師渡江臺城蔽壘調發徵歛繁於秋荼府君夤奉簡
書事不愆素曾未數月得代而歸老幼攀轅易服宵遁
當是時也國命將墜人謀已改府君杜門稱疾不交世
務靜以觀變默而俟時俄而黃旗運終青蓋西上詔旨
敦迫州司臨門方促星火之期忽嬰霜露之疾不克上
道因以家居惡石無徵梁木斯壞享年六十有五未躋

於壽厯試百里之宰未盡其才有折衝制勝之畧值艱
虞而不得伸有化民成俗之具逢承平而不及用齎志
沒地遺恨終天行道之人所共歎惜府君娶武寧章氏
駕部郎中嵩之女也生先君諱某象賢惟肖稟訓無違
官學四方名聲藉甚及府君歸老別墅先君終鮮兄弟
烝烝就養不離左右被褐懷玉韜光戢曜以至下荼蓼
之苦荷清白之謀世故紛綸家徒窘絕未遑謝策奄茲
淪逝後府君九年而終咸平二年十一月天子有事南

郊其孤億任諫官有司以丙戌詔書追贈先君為大理
評事寵被泉壤慶延里閭行路歎息父老榮之四女長
適隴西李瓊次適清河張仲言後府君七年而逝次適
河間俞簡成次適清河張彞憲率皆太族莫非令人婦
德嬪風表儀宗黨府君之任玉山也其孫億始生億將
生之夕府君前得吉夢謂必興吾門躬自撫養特所鍾
愛纔免襁褓教以詩書及府君之捐館舍億五歲矣方
在孩抱未達慈顏逮十有一歲太宗皇帝遂聞其名徵

詣闕下試以詞賦官於秘書自是入蓬丘直仙殿升近
署寘周行為天子從官成國家大典非錫羨餘慶燕翼
貽謀天啟畢萬之大名世祚于公之陰德不然者最爾
億何以及茲億自舉族還都再見閏月歎墓木之已拱
憂堂構之將頽前年獻封公車求領郡政皇上固留不
遣億懇請而行甌粵之區封畛相錯伏念昔者府君之
歸宅窆也銘誌闕如歲月寢深耆舊猶在遂用採撫以
備萬一謹按府君天姿謹厚寬中多恕行有枝葉心無

町畦慷慨經綸博通治體信著朋友仁洽閨門勝冠之
年逮事祖母被疾沈痼經時伏枕府君束帶奉侍夙夜
匪懈嘗惡澣洗無所不為府君母弟五人率以豪狹自
任鮮車怒馬輕裘緩帶出入閭里持吏短長暴虎馮河
使酒難近私匿亡命結客報仇人胥畏之莫敢忤視府
君戒督備至櫬楚是用諸弟惕息剛悍少衰皆以天年
死於牖下議者許府君之善教也涉獵史傳詳明典故
銳意風雅動成篇章及試吏方州嘗奏伎記室巧為書

檄曲暢事情兵戈之餘遺橐散落素善草隸自可名家
天縱多能洞曉鍾律新聲度曲精義入神圖緯術數罔
不研覈碁陸蒲塞出於餘力若乃張仲之孝友安世之
慎密史魚之直伯夷之清甯俞之忠石奮之謹劉文饒
之恕秦巴西之仁庾亮之風流山濤之識度凡是衆美
無一闕焉時方構屯位不充量蓋仲尼云如有用我者
其為東周乎漢文謂李廣惜不當高祖世萬戶侯豈足
道哉命之通塞道之行否固有冥數矣夫惟賢者能論

譔其先祖之美而明著之於後世者也無美而稱之是
誣有善而弗知不明知而弗傳不仁三者君子之所恥
也恭惟府君之德業章章如是國史弗載鼎銘未刊春
衲秋嘗彌用怵惕冬裘夏葛靡敢遑寧嗚呼不見成人
范喬之悲罔極有慙於長太丘之德未衰爰勒貞珉以
永終古盼蠻非遠聲效如聞嗣孫之勤尚或臨鑒云耳

碣二首

故隴西彭君墓碣銘

并序

碑碣之制著於令甲咸以官品而有等威至於孝義著聞隱淪不仕亦許刊石表行以示後人斯國朝之盛典也隴西彭君諱悅字仲荀予同郡人其先屬玄王之勤商與豕韋而更霸保姓受氏德厚流光乃至鏗為大夫以耄老而著稱宣為三公由經術而進用錫羨蕃衍垂裕後昆枝葉扶疎譜牒散落至君之七代祖始占籍建安因以土著奕世似續孝謹不衰有蘇秦二頃之田得猗頓五特之術治產殖貨貲擬王公大王父英屬王氏

建邦亟登勇爵實貞師律式遏外虞受署御史中丞本
鎮防遏使王公晏為之副貳以壯戎麾烈考大規值金
陵用師閩隅瓦解遂忘懷物表脫跡世紛樂一丘之棲
遲詠幽人之長往及天地開泰車書混同華黍盈疇素
髮垂領鼓腹含哺為太平之民君特達不羈旁通多可
跌宕文史慷慨經綸立義不侵好為然諾之信捐生赴
難靡以在亡為辭睦族以仁事親以禮勤接士類賓至
如歸教行閨門衣無常主脫驂周急斯乃細行折券市

義固其素蓄汝南之俗咸出子將之評潁川之人懼為
陳君所短一境從化或行者之讓塗千里請交多升堂
而拜母窺義府者不見岸谷飲德馨者有如椒蘭仲尼
所謂君子儒者此之謂矣始以肄業之故自鄉里杖策
游潯陽之廬山勵精為學纔期歲之內以詞賦擅名同
時輩流亦所推尚未遑鄉老之薦屬有樓船之師歸省
庭闈甘心畎畝年甫壯室尚丘園而考槃爵非公乘與
令丞而亢禮頗為州縣之敦迫遂與計吏而偕西裏足

戒途推鋒戰藝凡兩就於貢部皆不利於春官敗於垂
成終以旅退豈時命之未會將地勢之使然耶拂衣言
歸歛迹肥遯以為自足於已何必陳力於周行獨善其
身安事儻來之外物由是調甘滑滌滲之味以潔膳羞
督畋漁耕鑿之業以豐生產法周禮而闢庠序以教子
弟慕鄭莊之置驛馬以待賓客無營無欲優哉游哉如
是者歲星一周於天矣遽丁烈考之憂君天性純孝居
喪過禮柴毀骨立觸地無容果以藥棘之傷生不逮苴

麻之終制去年夏以先君窀穸之事市葬器於上饒之鉛山跋履山川蒙犯霧露得疾逆旅肩舁而歸反席未安瞑目長往年四十九即以其年五月十二日從先君之喪歸葬於新豐鄉王殿源靈際山祔於兆域之側禮也夫人武寧章氏故汀洲歸化令士廉之女也雅有婦德宜其室家前君而亡墳未宿草嗣子歆承詩禮之訓挺岐嶷之姿未及勝冠之年已負肯堂之志趣向遠大意行瑰琦所謂謝庭之芝蘭當為周廟之瑚璉驥子絕

足未易可量唯君蹈德體仁秉彛居簡量陂萬頃莫測
其涯宮牆數仞孰窺其奧言行相顧磨涅靡渝誠明內
融應接無滯而不登一命不沾一祿蓋日車亭午或覆
盆之有遺脂網橫流亦吞舟之斯漏然方朔殊少於自
薦而澹臺頗失於不言空邁盛時莫躋仕路茲士友之
所共歎惜也然施於有政是亦為政又何必社稷人民
始為行道不患無位患所以立又何必軒冕爵位乃曰
成名嗚呼彭君亦可以為達矣予與君有桑梓之舊連

瓜葛之姻顧惟忘年之交實辱同聲之分嘗念淳化中
自書殿歸寧榜小舟遊武夷山道出君之舍下君率族
人攜酒餽俟我於江干班荆藉草引滿舉白半酣耳熱
迭舞相屬且為十日之飲飽聞同心之言自茲分飛三
見閏月歲不我與逝者如斯其孤泣血奉書乞文表墓
感故人之疇昔嘉孝子之勤拳莫漬酒以伸衷空含毫
而叙美銘曰

移孝為忠乃可從政自家刑國亦以觀行猗歟彭君含

華不競嗃嗃閨門詵詵子姓睦族親仁讓夷急病進以
干祿退而知命萬石孝謹出於天性太丘家風宜書甲
令良玉蘊璞岩谷增輝矦弋徒設冥鴻已飛隱居求志
色養無違鄉黨胥化閨門已肥王戎死孝銜哀不饑公
明短折異代同歸泉臺永閤草露空晞刻茲圭石以志
音徽

劉氏太夫人天水縣太君趙氏墓碣銘

并序

咸平中詔以秘書丞直集賢院劉君隲同修起居注實

執素臣之筆入踐赤墀之塗侍從穆清親逢旦暮出扈
詔蹕入宿周廬為儒之榮舉無與比時君奉太夫人就
養於京師夕膳晨羞既馨而潔出告反面式燕以寧諸
孫在旁冢婦佐餽說說有後啟于公之高門蒸蒸承顏
奉魯侯之壽母搢紳欽羨人倫聳慕屬天子兩郊吉土
推恩百執湯沐之典時庸顯親詔封夫人成紀縣太君
又徙天水恭惟疏邑之典用旌斷機之訓徵名數於石
竊報劬勞於棘心人子之道斯為至矣而夫人從子之

貴去國長懷當一喜一懼之年動維桑與梓之念君由

是奉公車之奏牘求會稽之郡章天子俞之即命領衡
陽郡事前席宣室從容話言賜金內府光寵行邁且以
君出入交戟多歷年所筆削汗簡克謹官業又自曲臺
博士遷尚書外郎以坐曹應宿之重領按部行春之寄
衣色五綵雜舊綬以相鮮車朱兩轡先版輿而奉引帳
飲別墅上壽高堂合戚屬以叙燕私道舊故而為笑樂
揮金告竭家忘其貧常膳載加喜形於色嗚呼不幸夫

人以景德二年正月己未終於郡廨之正寢享年八十有六卽以其年丁丑歸葬於潭州長沙縣長沙鄉祔於太博府君之塋禮也夫人其先京兆人家世儒素父拯終澧州慈利令妣滎陽鄭氏故連州刺史堯庭之女夫人既笄歸於劉氏實澧州錄事參軍累贈太常博士諱延學字贊明也博士君肯構其家以儒為業讀易得伏羲之旨詠詩有騷人之風振跡丘園試吏州縣實有仁惠在於閭閻凡厯五官終以無過夫人輔佐君子宜其

室家及茹痛未亡靡它誓志諸孤藐若四壁蕭然夫人
躬機杼以給伏臘男且就學擇鄰居以示訓女將適人
結衿褱以申戚鞠育勤苦越十五年而工部從賦鄉書
策名仕籍稽古幹事為時聞人蓋劉氏之族繫夫人而
立也夫人雅性奉佛深通內典女工之暇唯誦金言寡
居已來殆廢膏沐治家以正教子以嚴御下以仁奉身
以儉用能閨風閭範式是六姻壽考康寧享茲五福迹
其雅素豈徒然哉一女適魯國曾弼舉進士終殿中丞

工部三子曰直方舉進士任大理寺丞潭州通判曰直
溫直清並業進士二女長適會稽夏渙舉進士得大理
評事知鄂嘉魚縣次適譙國夏侯藏用亦進士內外姻
戚莫匪文儒一門之中素風特盛積善之後餘慶巨量
工部君履霜露以涕洟奉几筵而欒棘五十而慕出於
至性三年之制善守禮經且以封樹克終歲月增逝大
懼徽懿闇而不彰遠咨遊舊文以為託書郵絡繹玉音
薦委稟陶母之德誠媿春秋之徒表京兆之阡式謹樵

蘇之禁銘曰

嫵婉之德宗姻是式表南國兮
嚙嚙閨門繩繩子孫昌
後昆兮脂田換縣蘭陔潔膳壽觴薦兮
萊衣斑斑冢婦
執笄慶承顏兮融峰峻極湘波碧色
啟封域兮報德昊
天勒銘新阡垂億年兮

武夷新集卷八